

Oraziun: en jöbia ai 22 de merz ales 20:00 s'encunta te salf de calogna d'Al Plan le grup de oraziun con signor Sepl Granruaz. Düc canc é enviés y benodüs.

Referat: "La Pröma Vera tles Dolomites dla odüda archeologica" con Rupert Gietl en vendres ai 23 de merz ales 20:00 tla Ciasa dal Parch Natural a Al Plan. L'archeolog Rupert Gietl se dá jö belo da agn con enrescides archeologiches sora la Pröma Vera. Tal zenter dla enrescida él en cösc iade le Parch Natural dertant la Pröma Vera, con atenziun particulara ala postaziun sön Col Bechei. **I Scizeri d'La Pli** prejentará le proiet de ricostruziun de cösta postaziun. Düc é der bel enviés.

Sorvisc ai Jogn: le SaJ lascia alessei ch'al é ciamó posc ledi pro l'Isté deboriada tl'edema dai 9.7. ai 27.7. a La Pli, dai 30.7. ai 10.8. a Rina y dai 13.8. ai 17.8. a Al Plan. Pro le Cool summer él ciamó la poscibilité da se scrí ete pro la "Bike week" y pa l'edema de "En artist por en edema". Pa My summer él ciamó la poscibilité da tó pert al "Curs da arpizé" y "We are aktive". Enformaziuns te SaJ, ☎ 0474 523070.

La Spona: la Comunità Comprensoriala de Puster chir por la strotöra por porsones con desabilité „La Spona“ a Pederöa na operadessa sozio-assistenziala (figöra profesionala numer 38 – V. nivel). Por informaziuns telefoné ala responsabla dla strotöra Sabine Federa, ☎ 0471 843060.

Ciasa de Palsa: la Ciasa de Palsa Ojöp Frëinademetz chir praticanc/antes danter 16 y 21 agn por l'isté co a veia y motivaziun da emparé a conesce la Ciasa de Palsa y sü berbesc y medes. Por enformaziuns plü monüdes, ☎ 0474 524783 y son la plata Internet www.stiftungsparkasse.it. Le proiet ven motü a jí con le sostegn dla Stiftung Südtiroler Sparkasse, dal Südtiroler Jugendring, dal "KVV - Wohnen im Alter" y dla Assoziatiun Provinziala dles Ciasas de Palsa.

Grup Atmosfera: „Ciodí é pa les iniüstizies y les soferenzes dla cruzifijiun de Gejú bones da nes dé salveza y liberaziun?“ referat con siur Sepl Granruaz, tla stöa da Oies en jöbia ai 22 de merz ales 15:30. Tal cader dles encuntades dal grup de autoaiüt „Atmosfera“ vegnel organisé dal Raiun Sozial n domisdé de reflsciuns sora ci co é bun y dert y ci che Gejú ó se ensigné ince por nosta vita da vigne de. La manifestaziun é daverta a düc; enformaziuns da Sabine Rainer, ☎ 0474 524519.

Mostra: le Museum Ladin Ciastel de Tor organiseia por le isté 2018 na mostra sora la scora tles valades ladines. Por cösta ocasiun chiriunse obiec y material desco imprest o scincunda (por ejempl material da scrí, libri, documonc, vedli banc, vedles tasces da scora y i.i.). Preitambel telefonede a ☎ 0474 524020 o scriede na e-mail a info@museumladin.it

Döt le bun a:	Maria Vittoria Ellemunter Schenk, <i>Santa Cristina</i> *	18.03.1932
	Anna Kier Erlacher	* 19.03.1938
	Benedetto Fiung	* 20.03.1929
	Maria Gabriella Willeit Rindler	* 22.03.1933
	y a düc chi co á santennom y complesc i agn cöst'edema	

Impressum: Ploania d'La Pli; redaziun Franz Rigo y Edith Willeit
Comunicaziuns cina le dedemesaledema sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania
La Pli de Mareo
 Santa Maria dal Bun Consei

Ploan: Signor Heinrich Perathoner
 E-mail: ploania@gmx.net

Calogna Al Plan: 0474 501006
 Radio de Ploania: 93,00 MhZ

UNITÉ PASTORALA



VAL BADIA
www.unitepastorala.org

Ann B

18.03.2018 - Cuinta domegna de Carsema

n. 16

Sce önn ô mo sorví, dessel gní do a me; y olache iu sun, danló sará ince mio sorvidú.

☞ **Ier 31, 31–34 | Ebr 5, 7–9 | Jan 12, 20–33**

Dal Vangelo do San Jan:


Te chel tomp ²⁰ti é valgügn greccs, co oreá en la festa de Pasca adoré Idio a Ierúsalem, ²¹jüs pormez a Filipus, co ea da Betsaida tla Galilea, y ti á dit: Signur, i orésson odei Gejú. ²²Filipus é jü y ti l'á dit a André; André y Filipus é jüs y ti l'á dit a Gejú. ²³Mo Gejú ti á rospognü: L'ora é gnüda, che le Fi dal Om ven glorifiché. ²⁴Amen, amen, i ves diji: Sce le granel de formont ne toma nia te tera y mör, romágnel su; mo sc'al mör portel trep früt. ²⁵Chel co é taché a söa vita, la perd; mo chel co arata püch söa vita te cösc monn, la mantignará por la vita eterna. ²⁶Sce önn ô mo sorví, dessel mo gní do; y olache iu sun, danló sarál ince mio sorvidú. Sce önn mo sorvesc, sarál le Pere co l'onoreia. ²⁷Sen á mia anima la ria. Ci dessi pa dí: Pere, salvemo fora de cösta ora? Mo por cösc sunse gnü te cösc monn. ²⁸Pere, glorificheia to ennom! Danló él gnü na usc dal ci: I l'á belo glorifiché y i le glorificará endô. ²⁹La meja co ea lapró y á aldí cösc, dijea: Al á toné. D'atri dijea: N angelo á baié con el. ³⁰Gejú á rospognü y á dit: Nia por me ne n'ea cösta usc, mo por os. ³¹Sen vegnel tigní iudize sora cösc monn; sen gnará sciuré fora le regnant de cösc monn. ³²Y iu, canch'i sará inalzé sora la tera, tirarái düc pormez a me. ³³Cösc dijël, por indiché a ci maniera ch'al dea morí.

Oraziun dal de

Periun! Signur, nosc Dio, por amur al monn s'á to Fi sorandé ala mort: láscesse resté te so amur y con töa grazia vire de söa forza.

Do cösc te periunse por nosc Signur Gejú Crist, to Fi, co é Dio y vir y regneia con te t'unité dal Spirit Sant por düc i secui dai secui. – Amen.

(Lezionar B)



☞ **Letöres dla Domegna dal orí | Festa dal ingres de Gejú a Ierúsalem:**
Is 50, 4–7 | Fil 2, 6–11 | Mc 14, 1 – 15, 47 (15,1 – 39)

Edema liturgica dai 18.03. ai 25.03.2018

DOM 18.	Cuinta domegna de Carsema <i>Ziril da Ierúsalem, Eduard</i>
08:30	gran messa por dōta la ploania <i>oferta por i debojügn dla ploania</i>
→ 19:30	Via Crucis con grups y uniuns
Lön 19.	GRAN FESTA DE SANT'OJEP OM DE SANTA MARIA , festa dai peri
→ 19:30	s.m. en onú de Sant'Ojep por l'Uniun dai Ei <i>♪ orghi da man</i> s.m. en onú y de rengraziamont de Sant'Ojep laorante s.m. por †† Linda Promberger Trebo y Lois Valentin
Ded 20.	<i>Wolfram, Irmgard, Claudia</i>
→ 19:30	preparaziun y pissia da Pasca por l'Uniun dles Eres con P. Franz da Oies, s.m. con Comegnun da Pasca s.m. por vis y defonti dla fam. Crazzolarà, Sorá s.m. por † Rosa Marchetti, Sotró
Dem 21.	<i>Christian, Benedet, Emilie</i>
18:00	<i>s.m. a Al Plan</i>
Jöb 22.	<i>Lea, beat Clemens August, Elmar</i>
→ 19:30	preparaziun y pissia da Pasca por l'Uniun dai Ei con sig. Pio Daprè, s.m. con Comegnun da Pasca s.m. por les families Erardi, Marô s.m. por † Milia Kastlunger, Alnei
Ven 23.	<i>Turibio Mongrovejo, Rebeca</i> astinonza dla cern
→ 14:30	preparaziun y pissia da Pasca dai scolari dla scora mesana
Sab 24.	<i>Elias, Caterina, Simon</i>
→ 19:30	preparaziun y pissia da Pasca por la Joneza, s.m. con Comegnun da Pasca s.m. por vis y defonti dla fam. Erlacher, Tomele s.m. de rengraziamont dles grazies y fortünes s.m. por † Massimo Topran Cutin s.m. por defonti dla familia dal Craizer
DOM 25.	Domegna dal orí, FESTA DAL INGRES DE GEJÚ A IERÚSALEM,
→ 08:15	benedisciun dal belorí jö dal paiun, prozesciun te dlíjia,
ora da disté!	gran messa por dōta la ploania con la Pasciun do San Merch
10:00	<i>s.m. a Al Plan</i>
ampola:	por la fam. Ellecosta, Simele
ministronc:	▶ da doman y domegna: Nicolas Ellemunter y Fabian Winkler ▶ da sera y domegna: Denise Erlacher y Noemi Erlacher
i recordun:	Giustina Agreiter ved. Maneschg + 22.03.2011 Rosa Rigo ved. Canins, La Ila + 23.03.2010



Früt de vita (Jan 12, 20–33)

I ponsi do

Gejú fej riferimont a sōa mort: el é la somonza co porta trec früc. Sōn la crusc nes vegnel scinché a dúc la salveza, l'amicizia y la misericordia de Dio. Degün der discepl de Gejú pó ponsé da se tigní la vita por se: al la met plütosc a desposiziun dai fredesc, con n amur co costa sacrifici mo da ince tan de ligreza.

I preii ensciö

I ti ciari ai ciamp de bla, ales plantes y ai ciöf, y i m'anáda che ia do sōa beleza y vitalité él dagnora ince la mort: chera dla somonza da olá che döt é nasciü. I ciari encer me ia y veighi esperionzes d'amur y de pêsc, d'amicizia y de solidarité, y i vegni alassora che iadedò él dagnora ince la mort: chera dal egoism y dla cativeria. Che medema mort che tō Gejú as trasformé, sōn la crusc, te n meterman de na vita nea. Deidemo vire desco tō y por te, tal fū de to amur y tla desponibilité y sinzirité con i atri. Mia vita dess ester por dúc desco na planta de früc co partesc fora y dá ennant vita a chi co á debojügn.

I mo toli dant: I dijará de "no" ala fraidité y al'egoism, por le tasformé te n "poa" al'amizizia y ala fraternité.



Gran festa de Sant'Ojep



„Das Vorbild des hl. Josef ist für uns alle ein eindringlicher Aufruf, die Aufgabe, die uns von der Vorsehung anvertraut wurde, in Treue, Einfachheit und Bescheidenheit zu erfüllen. Ich denke vor allem an die Familienväter und -mütter, und ich bete dafür, dass sie die Schönheit eines einfachen, arbeitsamen Lebens stets zu schätzen wissen, indem sie ihre eheliche Beziehung sorgfältig pflegen und ihren großen und nicht einfachen Erziehungsauftrag mit Begeisterung wahrnehmen.“
Benedikt XVI. 19.03.2006



Vita de ploania y de paisc

- **Pilora da Pasca 2018:** “Canche Gejú odea na te' meja de jont, s'la menál picé; deache ai ea stanc y menés pro desco biesces co n'á degün famei. Danló ti ál dit a sü discepl: **La racolta é grana, mo al é ma püc orás. Periede porchel le patrún dla racolta, ch'al meni laoranc por sōa racolta**” (Mt 9, 36-38). Cōstes parores dal vangelo de San Mateo á dé l'impuls por la pilora da Pasca da eniann. I orun se tó a cōr l'envit de Gejú, **le Bun Famei**, y perié entres endò do laoranti por sōa racolta. L'oraziun tla pilora é en envit y na proposta por perié do vocaziuns, dandadöt la **jöbia dan le pröm vendres, de d'oraziun do vocaziuns**.
- **Iolan y Dio s'al páii de Ostes ofertes:** por le KVV (4.3.) 332,21 (KVV La Pli 132,21 €, KVV Balsan 200 €), por le Kassian-Tschiederer-Werk (11.3.) 247,51 €.

→ Les “Stories de Adam y Eva cuntades ai mituns” va ennant do Pasca